

雪橋詩話三集



雪橋詩話二集卷第二

遼陽楊鍾羲撰集

吳興劉承幹參校

太宗文皇帝釋奠文廟卽立文館築翔鳳閣以譯書史
儲祕籍卽後來文溯閣之東南閣也實開文治之先翁
正三送畧士直閣往盛京文溯閣度書云要與麟臺添
故事更瞻鳳閣溯興京

寧武關周忠武遇吉力戰捐軀曹棟亭鐵冠圖總戎別
母一齣觀者無不歔歔忠武曾拒我朝之兵于河西務
太宗臨陣歎曰自登州登陸以來如入無人之境惟

此一戰差強人意耳王梅泚寒夜觀劇偶成詩云擎杯
含淚奉高堂寧武關前血戰場一戰差強人意耳早傳
袞語自 先皇其墓在寧武東門外半山溪流泛濫由
墓南衝激而過黃勤敏謂乾隆乙巳夏大雨浹旬水勢
幾及墓七月墓前土忽墳起二高阜延袤數丈逼溪溜
中趨衝激之患遂已彭甘亭有詩紀異寧武參將府卽
明總兵署木坊上有劉夫人射賊箭彭檀亦香有詩紀
之

禮烈親王從 太祖征哈達平輝發定葉赫等國大破
烏喇軍 太宗朝征蒙古喀扎魯特部敗明師于薊州

遵化圍大凌河城生禽明監軍道張春等嘉慶中宋煥
襄奉題骸箭圖應教云禮烈親王箭傳觀血尙濃乾坤
方失鹿風雨正飛龍霹靂掣天一颼颼穿甲重當時薩
爾滸此物最摧鋒七葉傳孫子河山紀爾庸凌煙大羽
箭洛誥古功宗世守刀同赤言藏弓自彤還聞有戰馬
曹霸亦遭逢王又有所乘戰馬圖也

我朝內宮之制乾清宮交泰殿坤寧宮爲紫微正中坤
寧宮後爲坤寧門門外爲御花園園中奇石羅布佳木
鬱蔥順治丙申高陽李臺書相國以奉安乾清宮牌楹
獲寓目焉有詩云御園清邃接坤寧琪樹千章蔭內庭

絕巘雲霞環紫翠中天簾幕敞青冥奔湍赴沼如鳴玉
怪石陳堦是賈星忽向僊都逢羽客步虛餘韻正泠泠
秦留仙蒼峴山人集恭紀 世祖皇帝遺事十首之四
云千騎傳呼簇玉鞍平明西苑朔風寒合圍親射雙雕
落不許降王仰面看離宮閱武及初冬清問還聞下九
重聞粵軍輸憂告匱親將節省命司農封章夕奏早批
朱清晝譚經到日晡講幄新移宏德殿天人稱絕董江
都御筆鍾王歎逼真不將戈法借儒臣親摹文敏書千
幅小璽朱鈐掌內人臺書相國頒刻董帖詩熙朝文治
啟芳規舊墨新縑別殿披游藝偶然供藻鑿憐才何必

在同時鑄摹冊府貞珉永頒賜儒林縹帙奇欲效誠懸
論筆法小臣慙未解臨池

順治中特旨修文廟凡再幸學李文勤詩開國崇經術
投戈自得師卽今丹腹跡猶是治平基故老悲軒鼎諸
生泣頰池翠華曾存止兩度見鴻儀此康熙癸卯文廟
春祭追述之作已酉 聖祖幸學文勤扈從恭紀云八
載垂裳玉燭調臨靡盛典肇熙朝雲開御幄瞻周鼓風
引僊音奏舜韶釋奠已欣光壁水橫經更覩聽圜橋叨
陪劍履隨雕輦不羨崆峒扈蹕遙桐城何采敬輿視學
恭紀六十韻則順治九年作其詩略云南北瞻豐鎬東

西作澗灑衮衣親主鬯朱紱悉陳籩酬酢存兢業威容
中折旋工規無逸誦盟薦有孚攀設几尊彝貴行廚繭
栗牲躬桓欣鳳附冠帶慶蟬聯門闢環橋列池登映壁
圓藜然光倍炯薪燼火猶傳賚及先師脣施于博士員
大成侔覆載遠澤被曾玄曩感章縫遇茲看俎豆延準
今惟酌古裕後實從先更老勤從政公孤領集賢天心
垂易象峻德述堯篇

司成進講
乾象堯典

綠字超黃絹丹書煥彩

箋禹皋謨自典君父道兼乾至治民爲鑑微辭理易詮
盈虛嚴剝復箴範戒風愆觀昔曾題虎堂寧獨夢鱣履
祥仍疊疊膺服愈拳拳有位咸咨爾諸生共勉旃春溫

敷黍谷朝旭到寒氊啓筥頒宮錦充楹捧賜錢終身期
可荷翹首亦維虔在類應倅馘臨雍更獻豳屯營授經
藝羽獵息游畋齒胄尊膠序勤農首藉田災荒靡壅聽
綸綍屢俞蠲方富如岡算惟覘卜麻綿緝熙形穆穆駿
惠擯譏譏月屬庚辛令星消彗孛躔中阿芄械樸時夏
職戈鋌氣靜綏黔蜀聲馳定粵滇搜遺藏匱室闡祕略
蹄筌輒允昌言拜能令異教捐是皆堪鼓吹所重凜冰
淵盛事當難朽嘉儀已告竣舄穿松角過旂向籙林還
鴈旅連宸共魚麗奏斗邊榮分齊胙賜美詎穎羹專甘
露浮盤浥青絲貯籠鮮盃盛清醴豔盞饋御庖全浹日

賡周頌瞻雲拂舜弦笙鏞諧節族翟籥舞蹕躡昭代隆
儒術微官近講筵步趨丞相後侍坐聖人前肯構慙繩
武循情願仔肩懿宣懷史克獻賦薄陳騫云云敬輿爲
前明文端公後人已丑進士嘗奉敕纂修通鑑全書館
選錄籍江寧

范文肅生於萬厯丁酉康熙丙午卒年七十高陽相國
秋日城東感事云東北連山亂曉霞城闔初起散林鴟
翟公門客知誰至薤露歌殘望素車黃菊當年醉綺櫳
白楊今日起悲風平生幾許西州淚隔歲清秋此恨同
此送文肅公葬兼感乙巳秋送寧文毅也文毅字備皆

天命間卽在文館辦事天聰初從征大凌河及察哈爾
有功授世職嘗疏請設言官慎薦舉順治二年任宏文
院大學士丙戌丁亥己丑三典會試其劾溧陽相國略
謂人臣貪酷犯科國家癘疥之疾不足爲慮惟懷奸結
黨禍關宗社患莫大焉陳名夏奸亂日甚黨局且成臣
不憚舍殘軀以報聖主並列其罪狀請鞫訊焉致政十
年先文肅一年卒高陽二公門下士也

世祖幾暇臨池多書語錄有云散盡浮雲落盡花滿天
明月是生涯父慈子孝溪山外萬古清風現舊家書法
之外兼深畫理祕殿珠林石渠寶笈所載不下數十軸

嘗見潑墨山水作於乙未鈴璽一曰廣運之寶 聖祖
御書刻石者有懋勤殿法帖孝經多心經金剛經裴潏
劄子及靖邊帖嘗謂黃庭堅書清勁有秀氣顏魯公書
嚴氣正性可想見其臨難風節於古人墨蹟石刻暇卽
臨摹每日寫千餘字從無閒斷清字敏速從無錯誤批
摺論旨硃筆親書天亶生知健行不息 世宗御書墨
刻有朗吟閣法帖四宜堂法帖魏徵十思疏 高宗臨
董襍帖題云香光子米書得力最深故其下筆往往別
具神解又云香光書陶鑄各家于二王尤能脫盡官帖
窩曰得其神髓其出入顏米殆與之化題仿倪畫云倪

迂畫在元四家中稱逸品當所謂不從門入者其甥乃
強之爲譜要非談畫理者所能到冬夜乘興快仿一過
並錄圖說於右恍聽霓裳羽衣迴非太常法曲所能譜
但不規規形似作詩必此詩定知非詩人迂叟或當破
顏一笑耳識番馬圖云唐胡環番馬圖久已膾炙藝林
幾暇展玩惜其寫物傳神猶有不到者予東巡吉林北
駐上都于所爲拂廬弓矢之宜牧息漁獵之狀日考究
而勸賞之故約略成此圖以誌漠陲風物非欲與古人
爭勝也六十餘年宸翰睿藻炳耀寰區至拓土紀功其
碑版照於四裔不勝紀矣

周東岡懷陵述感詩新朝置冢戶奉帖歸陵旁元年賜
供田割麥薦享堂劉杜三遇王敬哉宗伯詩有聽說寢
園沾聖澤冬青無用布衣裁之句李容齋景帝廢陵詩
悠悠二百年壞道餘喬松我皇行見之積愀愴宸衷
置守禁樵採毅魄仍幽宮盛德之事前代所無楊文叔
翰編孝陵詩鼎湖龍去上天弓劍埋藏四百年金盃
玉魚無恙在不須清淚滴銅仙吳子珍待詔詩艱難王
業感前明十載高皇馬上爭後葉有時耽燕佚中原無
地不戈兵勝朝失鹿悲禾黍真主乘龍致治平二百
年來勞使節諸陵時祭冷榛荆此感豐中京邸感秋之

作有殷鑒之思焉

季滄葦讀史有感云人君勢原孤賴茲受恩臣子心不一何以報一人用賢須光明去奸莫遂巡奈何崑生殺惟窺笑與顰乃以朝廷爵因親及其親相尋于水火此屈而彼伸循環在一日訐訟如平民不憂河北賊何地置其身魏石生謂其蒼莽無粉澤似一篇大奏議

新城尚書於明詩推昌穀子業二家布衣則首舉吳非熊程孟陽謂吳以五言擅場源出於謝宣城何水部意得處時時近之七言自秦淮鬪草篇而外無頗可采程七言律學劉文房韓君平絕句出入於夢得牧之義山

古體不逮今體論定爲新安二布衣詩其門人汪于鼎
吳東巖授之梓非熊貧居云釜裏生魚甌裏塵非關久
雨卻關貧牀頭惟有梁鴻傳閒誘荆妻學古人暮春谿
居云漁絲誤冒在浮槎貪看澄波點落花空立磯頭不
成釣無魚人笑晚歸家頗見風趣其論本朝布衣之詩
則以石湖邢昉爲冠邵青門謂松圓詩多墮落旁趣如
風情缸面清明酒節物山頭穀雨茶非村學究對偶耶
不嫌晝漏三眠促方信春宵一刻爭非劇本中花面諱
語乎紙裏已空難愛惜餅儲欲罄未知謀非破窳中落
場詩乎若問揚州舊風月也曾騎鶴貫腰錢非鄭元和

劇落場詩乎遠雁如塵飛水面亂帆疑葉下吳頭夢裏
楚江昏似墨畫中湖雨白于絲賸添風月閒家具憑占
煙波小釣舟非張打油胡釘鉸之瓣香乎松圓爲虞山
所激賞青門素嫉虞山未免詆之太過耳

陳確庵自號七十二潭漁父毛子晉令其二子受業順
治戊戌詮次同志之詩爲之傳記曰離憂集明年己亥
復評次其門弟子之歌詩爲從游集其頑潭詩話則一
時醜唱之作也確庵諸子遜字子謙邀字子莊輿字以
載皆能詩邁字香谷移居膠城之東里有句云涉園未
得淵明趣寄廡還期德曜賢吳鐵庵康侯稱其門庭蕭

寂清風襲人不愧於陵家法云

聊城傅星巖相國早朝望鑪煙次同院韻云玉殿晨開
靜羽旗遙看煙氣上彤墀微升寶鼎分行細直接晴雲
散縷遲旭日乍融光似篆曉風纔定靄成絲清芬想像
浮龍袞仗外千官望自知臨胸馮文毅蘆溝橋迎大軍
作云鑾輿翠蓋出西城月滿蘆溝照御營十萬貔貅齊
勒馬親看拜纛至尊行親王捧膝動龍顏辛苦長征萬
里還日麗河山增氣象饒歌直入五雲間千官錦繡鳳
城西朱鷺聲遲曉色齊天語遙聞加慰藉歡呼雷動馬
長嘶少婦流黃望捷書沈沈關塞渺雙魚今朝喜極還

零涕拂拭征袍問起居武定李文襄同施愚山陪祀郊
壇云太乙瑤壇接露臺龍旌遙拂翠華來仙韶細度雲
門奏玉殿初明泰時開千尺鑪煙天外轉九重黻佩月
中迴祠官解有登封意獨向甘泉擁賦才安和典則自
是時代爲之

王西樵大雪偶爲拗體云蓬蒿小徑全欲沒松竹老梢
微辨青張蕭亭澣山灤云漠漠漁邨雨壓扉湖波不動
釣船稀畏人水鳥時驚去直向寒山影裏飛夜雪云斗
室香添小篆煙一燈靜對似枯禪忽驚夜半寒侵骨流
水無聲山皓然皆偶然卽目妙于寫生

宋玉叔竹罌草堂歌稱膠城朱松鄰白門濮仲謙皆以
竹器擅名詩云君不見練川朱生稱絕能昆刀善刻琅
玕青仙翁對弈辨毫髮美人徙倚何娉婷石壁巉巖入
煙靄澗水松風似可聽白門濮生亦其亞大樸不斲開
新砮虬鬚削盡見龍蛻輪囷蟠屈鴟夷形匠心奇創古
無有區區荷鍤羞劉伶練音集稱沈兼兩之之父漢川
爲朱三松高弟均善雕鏤而兩之更出其上乙酉七月
母顧妻周子元兒同赴水死有句云心事不隨時事改
百年猶見舊衣冠亦介士也

國初人絕句如宋徵輿渡河云黃河岸上起悲風夜半

清霜下碧空秋雁自南人自北一時來往月明中姜廷
梧結客少年場云豹服雕弓狐白裘腰閒秋水兩吳鉤
平生然諾輕生死自說家居古趙州沈謙怨歌行云南
陌提籠葉始生西堂秉杼錦旋成郎心莫是黃梅雨看
過春蠶便少晴周肇金陵歌云六朝金粉冷芙蓉愁對
雞鳴第一峰燕子潮聲不解意隔江猶送景陽鐘葉襄
謙周云劍閣雲昏天塹悠蜀江聲咽恨譙周可憐辛苦
三分業贏得陽亭一病侯紀映鍾題僧壁云萬事都無
老衲閒松窗日見鳥飛還鄰僧只在煙鐘外拄杖高懸
懶過山虞黃昊明妃曲云紫塞逶迤大漠秋髻鬟撩亂

不知愁來時略識君王面一出宮門便白頭陳廷會邊
庭秋怨云黃花積裏雁南翔白草原頭一望鄉此日空
闌刀尺動那知邊塞早飛霜朱隗四皓云鴻鵠冥冥與
世違衣冠奇偉是耶非真龍本不尋常見破壁丹青一
樣飛周鑄飲棠梨花下云園花昨日報紛紛披鶯語無端
佐酒卮莫待香殘空夜月落紅那莫上青枝類皆彈丸
脫手妙造自然至吳頴都門竹枝詞云井上啼號又幾
春漫憐蔡琰贖來身似曾細讀逋逃律不敢迴頭問熟
人申涵光燕京絕句云地壚朝進白羊羹處處霓裳聞
錦箏賜得紫貂新暖帽御橋霜滿駱駝鳴移來內市傍

松寮呵殿聲回散早朝拚得金錢矜意氣素瓷爭看舊
哥窯則紀一時之聞見也

王文靖昆仲皆於都下結屋蒔花竹其宅在橫街其園
皆以心部字顏之文靖曰怡園其羣季曰憶園曰懽園
查初白詩所謂華萼居相望平泉第對開者也王斗南
過怡園句云如何喬木裏只是冷雲多伊用侯游懽園
詩有賓朋閒話平津閣池館斜連覆盎門之句乾隆戊
寅益都朱鶴亭明府承煦將之官大治邀蔣恆軒錢蘅
石諸公集憶園賞海棠作憶園稷飲圖蘅石用壁閒王
右丞詩韻云絳萼綴新枚籠煙蓄露開須邀薛公序亦

問杜家來檐色申牌暝闌陰卍字迴不知香氣滅冉冉
落深杯翁覃溪嘗爲懺園書櫺又與擇石同賦詩嘗收
得國初諸前輩憶園修稷冊子勵南湖史胄司諸老手
迹皆在焉鶴亭出宰時覃溪方以讀禮館蠡縣劉村不
及與題是圖王子按試益都於慶晴邨都統坐上爲鶴
亭子肖野賦二律記之南西門外垂楊夾岸蒼葦環溪
夏時荷花直接小紅門紅雲綠霧數十里不絕而祖亭
王園尤踞其勝符幼魯詩一鏡荷花閒葦叢涼蟬聲咽
午晴風再行二里溪南路便入西川濯錦中祖氏園林
或謂卽王園非也王園爲成青壇相國舊園昔人所云

豐宜門外拜郊臺廉文正萬柳堂在焉今已莫詳其處
居人種芍藥爲業稱爲花海益都相國築園都城東南
夕照寺側亦名萬柳堂查德尹詩所謂萬株改種昔年
柳十笏重題舊日名方渭仁詩所謂城東近又垂楊好
今古風流許共看是已道光閒王寬甫有句云祇林夕
照入秋初萬柳堂無柳一株蓋阮文達植柳五百株不
雨枯壞也不獨野雲歌酒之地爲可憑弔矣

順治戊子柏鄉魏文毅疏請舉經筵以隆治本九年請
晉接羣臣面奏政事累請恤災荒緩工作開言路康熙
元年請移湖廣總督駐荊州及吳三桂反人服其先慮

嘗劾續順公沈永忠大學士陳之遴劉正宗成克鞏

世祖獎其孤直庚戌校士最稱得人嘗選同時人詩爲
觀始集自作如送宮紫元之廣陵云秋盡寒山出羈人
不可留劍光衝暮雨霜氣冷征裘薊北黃金貴淮南桂
樹幽送君從此去濯足大江流吳枚庵取以壓卷

李鄴園相國由金華司李入爲秋曹順治戊戌授言職
骨鯁無所避疏言錢糧私僉民解之害請復內直看詳
卽日票擬公同候旨杜任意更改之弊又疏論順治十
八年以後督撫率多夤緣而得有恃無恐橫取財物賄
賂權奸自與受同罪之法嚴無敢糾其貪黷與者不認

則言者涉虛故數年以來未嘗重處乞加甄別以裨吏
治他所陳奏多關國體時 聖祖初親大政稱爲真御

史康熙十二年由副都授浙江總督明年耿精忠反鄴
圍率師移鎮衢州復義烏湯溪破賊常山復壽昌東陽
嵯縣乃進復仙霞關別遣師徇江西諸賊悉平在軍推
誠待士賞罰必信士樂爲之死請蠲被兵州縣錢糧民
有陷賊來歸給食予耕種具壬戌入閣卒謚文襄查德
尹過仙霞感武定相國云誰數南征第一功時危方覺
地圖雄金戈已散星河氣援鳥猶驚草木風路轉干盤
通奧窔天開一線人鴻濛封侯不及開元相莫問新豐

折臂翁

文皇帝觀兵畿輔寶坻劉瑞圖尙書兆麒時年十四見
收爲官學生順治七年 詔選漢軍滿漢文藝以范文
肅爲考官名列上卷遂擢侍從晉副都十八年出撫湖
廣西山李來亨構逆籌兵餉不以累民闢高冠山南地
爲教場訓練士卒不數載伏莽悉定蠲賑墾荒施有餘
澤越三十餘年子玉伯中丞殿衡實踵其武遺民故老
猶擁馬首聞公起居嗣是督川閩改提督補黑龍江總
管年踰六十遂初林泉康熙戊子卒年八十五玉伯再撫
湖廣疏陳招墾荒田捐納牛種修築隄塍案糧均派窪

壓田畝估價均補屯田被水減半徵糧亦多惠政焉呂
天益光祿有劉中丞喬梓撫楚紀德詩

宋楊文理善吟詩中歲貧甚友人杜進士出爲縣令文
理欲往謁苦乏資斧久之楚有商於吳者難楊曰爲我
作行舟十詠卽載以往文理援筆立就商躍然起敬載
之往且厚贈焉常熟白波道人龐龍和韻十首爲錢木
庵許蒯庵所稱檣云海波秋激一圍雨湖氣春翻百尺
雲篙云一春點盡三湘水半夜敲殘五夜冰舵云雖然
未得三驅勢到底還留後勁心跳云偶或借將成捷徑
暫時收起謝分囂縉云滿衣塵土爭前路一背殘陽問

斷津槩云力淺祇堪驅舴艋聲多也慣攪鴛鴦篷云逐
日正誇梭似織隨潮不數馬能飛櫓云中流奮擊知誰
是子夜行歌自不聊鋪云淺深到處經行慣波浪層翻
在不忙纜云風高任擲孤篷外水漲難依古渡頭龍居
邑之西祿園篇什甚富存者祇此耳

武進孫風山檢討年二十入詞垣條奏巡方科場二事
極剴切因自請爲本縣令詔歸治疾構園亭娛親高風
堂下掘地得泉人呼爲丹泉其德州道中有懷季天中
云逐客飄零返舊疆累臣蹤跡去遐荒同膺遷謫憐君
違其效愚忠獨我狂那禁旅魂馳塞北懸知歸夢繞江

鄉一時俱抱寒蟬舌補牘逡巡負 聖皇汪舟次贈風

山詩云孫侯真偉人二十稱名臣掄才不識公子貴上
殷屢遭丞相嗔是詩天子最明聖日照蘭臺光四映鳳
鸞原與鷹隼殊苦抱封章效廷諍臣語羞雷同臣心恥
奔競願辭承明廬賜臣官武進會稽爭望買臣來茂陵
偏說相如病十年盡瘁十年閒歸拜雙親鬢未斑燈火
依然開萬卷杖藜一任徧三山丈夫進退理應爾百尺
青松笑桃李綵衣日日舞春風會有禎祥傳孝子君不
見高風堂下丹泉水其人其事亦翰苑羣書中之談助
也

婁縣曹叔芳上舍蔡有集一卷陸清獻其甥也清獻少
時隨母歸寧上舍撫之膝上曰是兒他日必成廉泉讓
水之名兒其勉之見清獻所爲傳中曹御扶詩襟情浩
浩近荒唐斗室閒消書傳香讓水廉泉成宅相膝端早

卜魏元陽

安邸馬三如孝廉長春數困公車遂蒔花種竹爲樂性
嗜茶游長興身與茶人入山采焙傾裝悉以製茶其秋
日游沂山觀百步崖瀑布有山田高於屋牛在屋上耕
之句康熙庚申寄示漁洋漁洋酷愛其語以爲善寫難
狀之景賦詩贈之有云此語非世人欲與東野爭詩成

寫團扇持以贈平生逾歲赴至漁洋爲志其墓

漁洋丁酉游歷下舉秋柳社東武邱海石清源柳公隆
任城楊聖宜兄弟益都孫仲孺咸集海石名石常箕冠
修劍有魯仲連辛幼安之風與丁野鶴善答野鶴云傳
來情事那堪論誓老名山不出門只當我今行腳去水
雲興盡卽歸村愛香山詩心情憺泊而以生嫁小蠻死
求大藥爲可議亦自有見地者也公隆名燾僅存游淨
寧寺一詩漁洋贈別公隆云彥緒清談居第二僧虔正
書無第三兩家德素自如此側溯流風爾不慙送我何
如征虜亭敬沖風味自沈冥更須多致吳興酒詹事年

來不願醒聖宜名通久鳧岫諭德士聰子漁洋懷人絕
句所謂清泉芳樹任城水柳惲文詞世所知太息楊生
今宿草南池風景古今悲也其讀徐文長四聲猿云落
筆乃如此何能不數奇繁聲無限意都寄一生悲漁洋
嘗言諭德公子聖喻聖企聖宜聖美皆富文采聖喻名
通睿其王介公招集古南池句云鶯聲野岸交情性蛙
部池塘喚醉醒聖企名通俊南池句云不見古人餘我
輩還來今夕對三星聖美名通俶亦與南池之集漁洋
社集明湖卽席賦送聖企聖美還濟寧兼寄聖宜詩任
城南望暮雲邊二妙還歸下瀨船海右亭中人似昨水

西橋畔晚多煙明湖素色清流集荷浦寒波去意牽且
進蓮塘今夕酒數聲漁笛起淒圓明湖秋社雅游頻何
異蘭亭禊暮春杖策偶來招隱士臨流翻欲送歸人柳
生對酒歌成雪邱子談詩筆有神歸遇中郎相問訊十
年此會足沾巾其兄弟唱和有鵠原詩文諸刻珠璧相
照可以想見一斑仲孺則文定公子寶侗侍文定京邸
每鄉試必遣歸家戒不得入京闈漁洋謂有唐質肅王
忠肅二公之風兄孝堪寶仍羣從伯純寶仁叔重寶任
皆能詩

丁野鶴嘗充內廷教習於米市築室王敬哉額曰陸舫

其屠牛歎呈張中柱學士云燕市西番舊羌落屠殺天生自安樂都城用牛不計萬遠近羣驅就束縛撐拄蹄角側不起努張血力睛猶爍飲刃一哮微帶聲中節砉然遂解髀庖丁見慣談笑輕一瞬十牛如振籜眾牛旁立相待死毛角濺濺神自若鬻肪同登大俎盤皮骨羣分百匠錯死猶濟物不辭用生本利人代耕作虎豹凶殘出於柙勞生盡力填谿壑功罪報施已不仁造物何嘗分厚薄東風春草年年生老牛死盡犢還耕漁洋謂其晚作亢厲然如此詩亦香山之遺也

諸城劉子羽廣文翼明少慷慨任俠與膠西王憫無竟

友無竟狂好大言鍵戶不與俗人接里中兒銜之乘亂
劫殺以死子羽走數百里訟之官盡取其讐置於法無
竟無後子羽迎養其老母又纂序遺稿付其壻張若木
以傳後三十五年四明周證山知卽墨以事繫膠州聞
獄卒吟十畝白雲松徑滿一天涼月竹亭幽詢知王生
作出獄後訪子羽并序其詩子羽久不遇乃專其力於
詩卒年八十餘詩往往悲無竟有云傷心丙子月春王
十載何堪母在堂宿草滿阡人更哭遺文行世鬼猶狂
老憐白髮空龍性病羨黃泉有雁行生死縈懷徒作惡
可能解脫兩相忘無竟之死在崇禎丙子也

田山薑尊人緒宗以壬辰進士知麗水有治行母張太君讀書知大義年七十示諸子書云示雯輩女昨來言里中先達及學校父老謀欲醵錢作爲屏幃爲吾壽者此親串盛心然揆諸情禮則甚有所不可今詳爲女曹言之案禮婦人無夫稱未亡人凡吉凶交際之事不與不爲主名故春秋書紀履緌來逆女公羊傳曰紀有母何以不稱母母不通也何休學云婦人無外事所以遠別也後世禮意寢失始有登堂拜母之事戰國時嚴仲子自觴聶政母前進百金爲壽此蓋任俠之流有所求而然耳豈爲禮當如是耶吾自女父歿於官提攜細弱

千里扶襯含辛茹蕨三十餘年闔戶辟績以禮自守今
幸女曹皆成立足慰餘年然此中嘗有隱痛歲首臙臘
兒女滿前牽衣嬉笑輒怛怛心動念女父之不及見故
或中坐歎息或輟箸而悲蓋三十年於此矣三十年古
凶交際之事不與知而今更强我爲主名其可謂之禮
乎頃者米價踊貴井里蕭然親故類多貧乏若復合錢
市簞爲未亡人進一日之甘是重有戾矣女曹備官於
朝宜曉大體其詳思禮意以安老人之情惟勿忽也詩
曰荼苦吟

艾長人司寇以宮僚得任子其父愛從兄元熹遂任其

子汝霖康熙丁未佐戶部疏稱私派最爲民害由於駁
查催提差役之多宜澄其源簡其事使部臣不得借名
詳愼而駁及不應駁上官不得託言急需而差所不必
差事少而雜費可省費省而私派不滋可謂知政體再
過石門卽事云霜落石門綠樹稀呼羣野馬自相依邑
傳十室看差似村住三家歎亦非厲鬼荒原餘戰鬪驚
魂永夜倒裳衣重歌樂士知何日黃葉偏隨四牡飛
程湟溱少與辭劍公屈翁山同受業於陳給事邦彥之
門給事旣殉節劍公翁山皆棄諸生湟溱獨身陷圍城
中與尊人匪凡並爲係縲取世資以自免自其試童子

時每冠軍輒有變故廢案辛卯秋試爲王邁人分校所
拔壬辰春入計借哀然舉首人以爲賀匪凡曰吾兒素
不利居首況嶺海初通南人孤士弁冕天下懼且不免
何賀也未幾果以磨勘題理黜不得第蓋首題君子有
大道二句先輩多專主用人言者謂與上文舉賢下文
聚斂之臣財用小入互相關照武陵胡此庵學士爲諸
生時曾用其說不見錄於有司至是以學士主會試闈
中得涅溱文大爲擊節而又出於河間左虞孫之房虞
孫已丑南宮第一也因擢爲元而要人子弟十八人皆
被擯落遂倡言元文不合朱注溧陽相國與此庵素不

相能脅首揆同疏論劾削去中式此庵坐是左遷壹鬱
死而榜中同是說者固不盡罷斥也湟溱旣不得志歸
南海傍西樵山之麓誅茅以居與曹秋岳朱竹垞訂交
又東游吳會西濫彭蠡與施尙白相值南州遂同登嘯
滕王閣賦詩贈答北走燕趙循太行觀九塞三關之險
詩日益工久之仕爲內祕書院誥敕撰文中書舍人與
陳說巖汪鈍翁王西樵阮亭倡和都門轉樞曹分校北
闈奉使山左右累官職方郎先是自國史院移計部與
阮亭同舍會齋宿郎署執卷論詩燭屢跋不止旁吏皆
私語曰兩公貴人何刺刺如書生爲其出守桂林也月

餘而三藩亂作竟以憂卒於全州年僅五十陳元孝給
事子也爲書致撫蠻將軍傅公歸其喪其孤衍祖時方
十五六阮亭以宮詹祭告南海哭於柩前挈衍祖以見
吳留村大司馬留村存恤之其同年進士連雙河自元
孝所取海日堂集請正於留村及三水令天翔程翼助
而梓之天翔王子入都時湟濤聘爲衍祖師者也前集
紀其才高召忌語焉不詳因並其出處交游記之其文
集論周武稱王之遽謂當盟津方渡亳鼎未遷大號未
可建也遂使人宣言曰有道曾孫周王發將有大正於
商遂儼然以王自命此與後世之君偶得一隅輒僭號

改物何異其說甚新

劉蒲庵考功嘗訂汝穎詩集其所標舉如張水臺先生
濂感懷云汗漫多情淹客住尋常有酒對花開病目云
無睡奈何秋夜雨有懷空負菊花辰張元漢憲副鶴騰
句云琴閒綠酒淺帆落碧雲高濁世嘗招隱春殘倍憶
家馮蔚仲處士司壁夜坐云火流螢度草檻動月移花
皆靚約可誦蒲庵工書畫尤邃于琴受指法于王生嘗
過蘇門與孫徵君論道遂置別墅爲留琴堂留琴而返
經太原訪傅青主于松莊坐牛屋下相對賦詩移日七
頌堂者爲禪宗例有頌古拈成連陸賈司馬徽桓伊沈

麟士王績韋應物七子各繫以詩因以名其集雨後月
一首效賈閬仙云雷雨西峰來向暮到鄰樹霑灑清涼
階陰蟲不發語片刻簾牖明急步出庭戶天學沈水碧
月如新濯吐爽氣開胸霧靜景瘳身苦春深宵亦深倦
眼遭心怒長安半旅舍名利雙輪古倚月有閒身中情
兩無取清雋遙深可以與古合轍舟行聞雁云孤帆月
黑貪風力臥惜驚鴻無靜飛歷亂煙深吟楚客低迷秋
老泣江妃栖非擇木商量久游不離羣遠近歸物候移
情諳澤國扣舷霜露欲霑衣亦見匠心別集空中語一
卷則豐容華贍者爲多罷官後手植花藥侍姬竝妙琴

詩

梁藥亭入峽詩有月親高峽燒星夾遠江燈之句陳元
孝和之云野燒難分月江星不礙燈順德何絳不偕客
端州往來峽中追賦一首云千峰夾一水孤舫夜中乘
野燒侵山月波星漾渚燈帆添知浪滅峽盡覺天增禾
黍離離近蓬窗且莫憑不偕隱跡北田與元孝暨陶窳
梁槌兄衡稱北田五子論詩甚嚴常以鹵莽目翁山槌
字器甫師雲林畫自號寒塘居士又號鐵船道人其送
不偕之潮州云擾擾不得志客心安可論古關羸馬路
窮海鱷魚津驛葉行邊落籬花到日新遨遊無不可天

地一閒人詩格亦復相近溫謙山謂不偕詩清超拔俗
有蟬蛻軒舉之風然賦形渺小搏翼不高清寒清薄亦
所不免可謂切中

番禺梁王顧明經無技有南樵集五言如落葉滿樵路
背雲時獨行掃石月不散看雲心亦孤均有晚唐風致
餘杭王舟瑤有水雲集句如流螢繞枝黃牘雪映殘星
去就君親良獨苦窮通兄弟那相求均見清逸京口談
長益序其詩以方干羅隱相方

南海諸生黃河澍字葵之有葵村集喜翁山歸自金陵
云一春寒食荒陵淚萬里秋風白髮心

吾鄉盧亨一中丞震原籍竟陵從龍隸漢軍少受知

章皇帝壬辰特拔置史館康熙己酉以閣學出撫偏沅
有清德子詢字舜徒屬毘陵管榆青村爲編奏疏二卷
杜詩說略二卷詩四卷曰說安堂集在任請蠲豁包賠
丁糧疏至三四率多報可杜詩說略凡二十四則文成
數萬於其神情脈絡肌骨腠理力開奧窔亦多得作者
之意雅頌集僅錄公詩一首於此集未之見也舜徒起
家州縣接武臺圻張匠門贈詩有廉吏何曾不可爲囊
無一物聖明知之句守楚雄日郡人陳士驥爲撰去思

碑

疊韻詩自元白春生春深倡和各二十首徐節孝和路

家新居十五首中峰禪師梅花百詠外趙恆夫林臥遙

集踵于章雲四律原韻疊至于首中間如集藥名詞名

數目五色八音等類及迴文兩頭叶韻以兩首作四首

俱極工巧贈張玉侯云家隔鴛湖煙雨樓忽攜一劍薊

門游匠心穿鑿峰形舞巧手經營石浪流赴辟無殊東

部到張紘赴孫權辟權呼東部而不名乞歸翻苦曲江留海山方丈干

層出紫禁香生御苑秋淒鏘玉磬靜昏塵岸脇隣响假

亦真石丈留莊堪醒酒花姑移檻好迎人驂騶蹀躞霜

蹄疾鷹鷄騰騫雪爪伸小圃亦勞君部署成吾隱趣理

煙綸閱徧平泉綠野餘長安酬酢不停居考工日食天
家俸排闥時窺禁籞書半榻霞蒸苔色嫩小山桂老市
塵疏一經高手來鑿鑿工澗縈紆足鳥魚採巖排石自
商論山水窩中指點存不必回溪空訪戴曾從別路急
追孫

宋之問有別路追孫楚句玉侯行止不能自由每于別路邀至

頻來豈厭家常飯

促去難終座上樽贏得茅亭三徑外忽添無數好峰墩

玉侯名淑以石造山頑石壘壘一經指點便成名勝章

雲謂如泥從印如草隨風二語可移贈玉侯喬梓昆仲

便可以贈此詩

梅村有張南垣傳

漁洋詩同時有仲子啟浣注論詩絕句後則有屈復注

秋柳金林始爲箋注惠定宇爲訓纂金氏箋注杭堇浦
謂所引詞林海錯羣碎錄及凡明人說部蒐瑣空陋不
宜徵用於所引馮贄南部煙花記蕭德言括地志陸法
言廣韻邱悅三國典略諸書則謂其撰人與書兩失所
引古辭古詩話輿志宮闕志膠葛陸賈行紀之類則謂
所引是何書並無其書惠每糾金而惠引德壽宮舞譜
則謂古無其書惠引任淵後漢書西域傳注則謂淵未
嘗注後漢書而轉蓬之釋則謂惠宜引後漢書輿服志
不宜引陳維室步里客談金牀玉几不歸來之解則謂
惠宜引後魏書及北史不宜引李清女世說也竹垞曝

書亭集有江楊二家注孫竹尹復有箋注之作趙秋谷言王才美於朱而學足以濟之朱學博於王而才足以舉之自來無空疏無具可以稱詩人者沈倫翁偶作云自古才人惜彩毫劉郎莫笑不題糕須知無字無來歷方是詩中一世豪禽鳥從來得氣先華陽國志枉流傳王雎舉世無人識望帝何曾託杜鵑自注謂杜甫杜鵑詩云生子百鳥巢百鳥不敢嗔仍爲餒其子禮若奉至尊此鳥自然知有君臣所以謂之王雎黃直翁曰自蜀人作華陽國志妄稱望帝化爲杜鵑遂有杜鵑杜宇之名而雎鳩王雎世反不識云云聖人教人學詩兼重多

識爾雅注蟲魚亦安可謂非磊落人哉

蘄水玉臺山枕蘭溪溪西流陸羽所稱第三泉也東坡
居黃州嘗游憩其地有詞云解鞍欹枕綠楊橋杜宇數
聲春曉邑人楊菊廬構亭玉臺之隴以春曉榜其亭崑
山李元仗少參視學楚中爲賦春曉亭歌元仗名可泐
顧瑞屏女夫也瑞屏鑿東巖得佳泉峭壁因築別業名
曰樂彼之園有亭榭樓閣之勝滄桑後元仗賦念奴嬌
一闋云危亭廢館斷腸處半嶺暮雲堆積鳥外孤鶩猶
記得長嘯振衣千尺幽壑含霜殘花泣露恨血千年碧
山陽聲咽問誰吹斷橫笛回首安石風流月明臺榭紅

燭留賓客國破城空瞬息閒勝事都成陳迹楚客招魂
歸來只恐怕水深波黑幾回偷眼淚痕濃染山色

長洲宋文恪尊人學朱明季以監察御史巡按山東濟
南城破及於難文恪以文學受主知議論侃侃康熙

十七年疏言各處統兵大將軍王以下有玩寇殃民營
私自便或購買婦女甚者攘奪民財請旨嚴飭山東帥
柯永綦縱民鼓譟具疏直糾逮京訊治與兄德宸弟德
宏有三宋之目在都下聞弟喪兼程還經理身後事撫
育孤女逾已出惠元龍北征集恭壽大司寇南和公四
首云至人千古心百歲等一瞥苟能盡忠孝乃與天壤

匹恭維南和公少小敦大節竭來掌邦禁刑禁絕騷屑
歲午月仲冬是公懸弧日從容置尊酒與客話風月龍
門多佳賓班坐襍野逸酒酣起再拜珠履競摩軋賀公
神明強願公壽耄耄鄙人不曉事頌禱言辭拙常聞父
老言往事記彷彿眾賓且安坐約略爲君說先朝陵替
時青齊敵充斥誰挑馬箠來不戰先辟易凜凜先中丞
虬髯怒張戟陸沈有同恨安問封疆責剡蒿登空城拔
劍斬嚙喙白徒那可用首鼠助作逆牙折梟不鳴戴頭
入鋒鏑蒲身無人續魂斷南門石公時年十六徒跣走
百驛上書動玉宸灑血一披瀝及夫南奔後陳情愈敦

迫庸臣與辱主聞見生感激赫蹠下中書浮議遂冰釋
昔觀泉明傳與公似一迹所遇異昭昏難易究什百將
來傳忠孝先後照史籍一門萃英賢標格最清舉置身
季孟閒敬愛各有理攻文競清新抱被同臥起雕鶚凌
長風健翮誰與比敬和青雲姿抱病委鄉里孤琴伴靈
牀萬事赴流水腸斷鄉書中淚灑金門裏悔爲一官誤
乞假與經紀吾聞同產憂棄官古有是曹全彼何人故
事在青史後世禮教衰留祿弗爲鄙廉頑仗吾公不獨
風義美萬石計安身恭謹但捫舌長孺社稷臣無乃太
唐突吾公獨不然忠愛寸心結平生尙寬和遇事則先

發年來正用兵駕馭事藏疾將驕軍士怒白刃起相掣
憂端不在大瞬息判治忽片言動天威低首就紀律聖
心初有憑跋扈氣盡奪功應奕世存慶可及身必虛無
赤松子豈敢比稷高乾坤惟君親回首兩無失只須勉
將來便是長生術詩意眞樸非介壽泛語文恪子大業
念功建業衣聞皆從元龍游念功歷官閣學典試江西
朱文端其所得士也

吳孟舉贈宋荔裳詩安雅堂中一卷詩風流蘊藉是吾
師驅除王李聲牙句擗當鍾譚吟鑿詞宋牧仲謂明三
百年劉基高啟諸人而後蔚興于李夢陽何景明景明

之詩沈鬱頓挫遜夢陽其與夢陽論詩諸書氣象之後益以清新逸俊故夢陽之詩全體杜甫者景明之力也其後太倉歷下諸子猶能守其宗風浸淫以降失其義類尋常宴集動引國事閨中禪房雜綴風塵充其類至于有雅頌而無風公安景陵輩起而詆之遂盡變其調而不自知其入于輕俗寒瘦之僻充其類又至于有風而無雅頌此論最得其平近人詩多幽而悉亦世運爲之耶

鄢陵梁日緝侍御別號皙次少卽嗜淵明詩得句云明月生東隅清輝照北牀長老驚異以乙未進士知陝之

咸寧行取爲御史嘗言今日遭逢聖世不難建白奉行
非其人豈惟膏澤不下而已吾居言路隨事盡職肯爲
名耶識者以爲富哉斯言非一意諤諤者所知也嘗巡
視茶馬於秦不名一錢或以爲言則笑曰吾籌之熟矣
居官而謀利爲子孫計耳子孫不肖而居厚實三蠹將
至曰盜賊曰博徒曰倡優吾懼三蠹之爲子孫憂也故
不敢懷歸田之思屬文與也畫江村讀書圖王漁洋輩
爲賦詩未幾移疾去位高念東贈詩有燕臺襍被親相
送一箇嵩邱行腳僧之句李武曾馬首望鄢陵懷梁侍
御云最憶梁夫子投簪返舊林沽名章不上籌世意何

深齋食繙僧笈山裝絡故琴停鞭欲有問行藥渺前岑
日緝耽內典讀杜詩分減二字謂出華嚴經阮亭鈍翁
極稱之以爲諸家注皆不之及惠松厓謂二字本東觀

漢記

歸安吳仁山裒輯騷賦樂府與十二代之詩著歷代詩
話八十卷康熙壬戌自訂南山堂詩十二卷重過隱者
書其壁云河上老人居清貧一古漁萍鄉全礙釣苾徑
半穿蔬童指向來客几增未見書只將瓢作具催句數
聯餘子光辛丑探花嘗充安南正使

唐鑄萬順治丁酉舉人官長子縣罷官後僑寓崑山文

師國策西漢有圃亭集及潛書爲魏叔子所稱李碩夫
感舊詩漳澤歸田後吳門屢賃居家還隔夔蜀跡自溷
樵漁衰謝交何晚纏緜意有餘尙傳經術在一卷著潛
書其序黃昌漳三芝堂集自謂久居吳中衰老習禪不
交游未免枯寂今得維後相與唱酬足以終老惜其詩
不多見

漁洋官總憲時兼兵部督捕侍郎與人尺牘有九卿會
議三法司會題無一事敢唯諾渙浥及督捕不令株連
兼培元氣云云官司寇時多所平反陸坡星詩奉使非
徒作賦才久留世澤在三槐聖朝刑措超文景爲有蘇

公敬慎來

康熙己未馮蒿庵以刑侍充讀卷官竣事 賜茶乾清

宮命與張繡紫少宰孫忭庭少司馬各賦詩蒿庵詩先

就有還看景運息戈鋌之句 仁廟諭鋌字稍生蒿庵

伏奏云因杜甫有戈鋌明雪色語後人相沿押用復諭

險韻排律用之不妨律詩似宜他擇卽面奏改云定有

鄒枚供視草還看房魏畫凌煙 上首肯稱善旣出時

盛傳誦施尙白詩受詔近傳詩句好親承天寵與深論

丙戌詔試部曹三十七人柴南屏方在比部恭和 御

製冬至詩有雪花欲共梅花落春意還同臘意舒之句

大被嘉賞遂擢御史遇合甚奇至戴文開從征臺灣凱旋日試春日早朝詩授侍講直南齋尤異數也

昆明虞虞山世瓔工書法有墨池瑣言小筆陣圖說王端簡宏祚跋其寄園十帖謂上自元常下迄徵仲手泐之石搨以自攜以薦辟給事內廷受知世祖擢光祿

署正康熙丁巳年八十聖祖念其先朝舊臣自光祿

寺丞擢少卿遷通參滇南平疏辭乞骸骨特賜銀幣馳驛歸王文簡送以詩云兩朝黃髮承恩久萬里青蛉擁傳歸驛路近南梅信早家山向日鷓鴣飛劫灰歷後昆明在華表來時故舊非檢點賜衣重灑淚孝陵松

柏已成園時康熙二十一年年八十五明年卒于家同
邑趙士英鼎望丙戌庶常奉命書赤壁賦於象牙筆筒
大蒙嘉賞與馬宣臣趙玉峰皆法右軍楊虹孫稱爲四
傑今遺蹟皆不多見滇南書家今人惟知有南園侍御
矣

順治乙未自中侍郎以滿洲進士第一人授修撰能詩
如梵放忽然寂前山間暝鐘聲催斜景入路隔翠微重
高松一片月挂在碧松枝煙溼露華下開軒讀楚詞有
韋蘇州鮮食寡欲焚香掃地之致

魏麀徵序梁宗洙僉事徽音集云含毫吮墨託志興歌

一若無意作詩而性情所感天籟自鳴下筆娓娓數百
言立就其贈竹庵上人云已公開丈室寂靜對雙林花
雨香浮檻松風清滿襟名香熏貝典花偈證禪心日落
羣峰靜寥寥聞梵音格韻力追唐軌校士江左衡鑒至
公稱得人焉

靜齋少宰禪岱嘗從軍鄂岳間賦詠爲多同陶五徽劉
爾俊乘月登黃鶴樓云幾度瀟湘百戰回一尊攜處一
徘徊橫江鶴影千年斷隔岸鐘聲半夜來芳草未窮詞
賦恨白雲消盡古今才登臨懷抱仍愁絕浩浩煙波蕩
未開與麟閣參政皆以翰林祕院參預戎幄滿洲文士

實開風氣之先

王船山寄衡山戴晉元詩松梢淺帶餘冬雪蘭若寒燒
丙夜燈一枕夢回衾似水不知仙洞隔朱陵衰年未稔
霜餘雁錦字難傳夜靜魚聞道文園方病渴莫修封禪
數行書晉元名曰煥避兵嶽寺夜執書就佛燈讀通五
經及諸子尤邃于易後游船山之門所造益深博縣令
商正葛亮臣聘修縣志亮臣訪戴山人隱居有交因淡
合偏能重身以窮堅未肯輕之句亦高隱之士也

王西樵詩揚子橋邊九層塔朝來不共紙鳶齊田子益
廣文春日雜詩云百丈牽風上搖搖勢欲鳴圖經郭子

作戲自漢宮成綽約衣裳薄低昂燕尾輕層霄偶爾到
得意似鵬程漁洋謂與考功同一寓意趙伸符詠風鳶
學江東體云節後遷移物象分春深城野見紛紜偶緣
塗飾能成質才有因依便入雲線影暗憑童稚引風聲
高逼帝天聞傷鴻病鵠知多少息羽垂頭合讓君浮家
集中有王西澗招飲見余風鳶之什病其一字喜而易
之卽席呈謝一首盧雅雨謂秋谷先生高才輕世於同
時後進鮮所許可以此爲世所詬病存此使知先生之
未嘗不虛懷也趙菁衫游峩嶺遂至趙秋谷飴山舊園
云四山松影罩城廬一路泉聲曳筍輿南郭堞橫青黛

裏北亭觴盡白頭餘幾人下馬尋秋草當日談龍已索
居太息荆坡無恙在未應竟自付樵漁

烏程董芝筠明經漢策博聞宏覽兼擅拳勇范忠貞撫
浙重其才特薦以科道用旋被臺參放歸蓋柄國者挾
有私憾忌者乘閒中之也忠貞殉難後浙人建祠於孤
山眾議以羽士何含白專司祠事芝筠與兒輩酌處贍
給焉其謁忠貞祠詩云淚灑西臺夢欲迷怒濤風急泊
長隄天涯渺渺無知己埋劍金庭伴鶴棲握機密啟意
躊躇篋有陰符返五湖卻悔囊錐猶未試女牆空見夜
啼烏自注謂癸丑八月將赴閩督時在京寓密陳數事

謂可安八閩因某遽歸不及隨行贊助爲恨感知之意
與用世之心具見此詩

陶季深入都門呼曹峩峩爲南曹曹實庵爲北曹友朋
閒遂以此爲稱號田山薑送峩峩南歸云眼中之人南
北曹飛揚跋扈文章豪酒後耳熱各大叫脫衫據地風
蕭蕭阿大樂府譜新曲媚峰一寸嶙峋高眉峰高一寸
爛醉起嶙峋

實庵句也小謝偏師出勁敵衙官屈宋窮搜雕旌旗壁壘非

一色藩籬闌入狂且驕坐客聞之掀髯笑奪席攘臂叢
譏嘲幽燕老將刁斗壯傖夫絳灌甘遁逃海內非此二
子者千秋無乃太寂寥當時汪蛟門自負詩歌獨以文

章讓峩媚填詞推實庵三人每酒酣爭勝不能下峩媚

頗爲長短句實庵曰汝不思壓倒蛟門乃闖吾藩籬耶

山薑及顏修來在座爲之捧腹絕倒山薑此詩紀其事

也峩媚以中書舉詞科歷官祭酒康熙辛酉增起居注

日講官八人峩媚與焉實庵贈峩媚移居之作云高齋

徙倚尙天涯灌木森然帶晚鴟分綠舊憐公子宅

宅舊爲張

舉之京兆草元今屬舍人家十千酒醒吳江鱸第二泉

分綠居烹顧渚茶聞說退朝饒盛事書聲連屋謝繁華時猶未

入詞館也吳園次詞選以實庵壓卷峩媚謂讀珂雪詞

雖十年學之不能並實庵衙官我有餘矣早受知於施

愚山愚山沒經紀其後不遺餘力嘗與汪文升論愚山
往事實庵涕泣交頤不復語其拜愚山先生野殯云杜
宇聲中飛紙灰野棠開處長青苔荒林寂寞應含笑白
髮門生鏡具來幽宮一拜一潸然絮酒何能到下泉記
否生存華屋處兔葵燕麥已芊芊文章華國竟何爲逝
水東流有盡期最是長安風雪裏含情相對夜深時文
升謂三章低回欲絕此真古人情事而作詩之本也合
觀二事皆足見其性情之眞

順治中楚中遭逆賊蹂躪之後郡邑殘破人民逃散又
遭大疫軍士多病死者道路相枕藉膠州李世錫霞裳

以辛丑進士宰嘉魚目擊其狀作哀沅云沅江水何深
深沉江橋長百尋上有修廊多涼陰內有臥病之軍士
或悲泣或呻吟出望軍幕徧四野無船不得過橋下不
聞軍中歌舞聲但見壯士戚顏哀音半如啞過橋北還
入城屋無壁惟空楹其中病軍何縱橫死人相望貴者
以火葬貧者委塵泥鳶烏快其上又見馬骨蔽地行者
掩鼻不能前填塞巷陌不知戰騎之死凡幾千疫氣鬱
鬱瘴雲元黃遺黎狂走心皇皇亂兵之後天降民以重
殃予何爲乎來此亦觸此危機病及三月伏牀幃瞻望
故鄉不能奮飛沈憂何繇繇浪浪淚沾衣東海有魚西

山有薇南方不可以止些招予魂兮行將歸有楚騷之
遺意焉其詠物詩田山薑以擬袁白燕甘草句云厯事
五朝長樂老未曾獨將漢留侯至今傳誦去嘉魚後十
二年重駐江干父老留之十餘日不能去其魚城留別
有相逢頻醉嘉魚酒午夜長吟無限情之句告歸南游
幾徧海內多攜閩中蘭蕙抵維揚度不能陸運至家遂
汎海而歸誅茅於雲溪南岸自號溪南老衲卒年八十
餘亦海岱振奇人也

碧山司寇色冷官罔卿時聘周青士入都與商風雅朱
立山中丞國柱嘗同曹實庵梅淵公耦長游讌聯吟朱

忠勤巡撫浙中寇盜未息多設方略導以歸順賊黨多
解散巡按旣撤重案悉歸巡撫數月閒審結得釋者甚
眾疏請蠲免温台諸郡無徵銀糧沿海居民避寇內徙
者發帑給田以贍之大軍征海厚犒諸將約以秋毫無
犯並嚴飭有司不得因軍興之際苛徵於民其桂山堂
爲平湖陸侍御作云清溪曲曲森叢桂山人寄迹非忘
世得歸盤谷且逍遙似到淮南成小憩立朝面冷如生
鐵百鍊之鋼不可拆對仗令人心膽寒歸田同我頭顱
雪我來正值落花時紅英片片浮春卮秋色桂林應更
好山中猿鶴毋相疑老輩事賢友仁之風隨時可見三

魚高賢此詩爲能寫照他若金清惠有招撫閩海功撫
順天多惠政張澹明觀察所志巡按四川時招集流移
令各復業疏陳金川事宜多被采納皆詩人而循吏者
也

汪舟次贈趙天羽詩吾鄉范良湖海士淮陰結客燕都
死相知不少任俠人隔絕山河千萬里趙侯藉藉邦之
彥驅馬長安方謁選承明趨走無時閒十日因依視含
斂范生笑入廣柳車左右更出臨危書書中絮絮意何
如託君煢煢藐諸孤藐孤遠在淮陰市飢鷹翼虎耿耿
視夜半躊躇朝策駢直憑意氣換征衣黃沙北走雁南

飛故人骸骨須臾歸拔劍坐使風波息食肉羞看狗彘
肥憶昨錢塘胡彥遠臨死不問家人產伸手大書作正
字老父嬌兒都不辨一朝白馬來紫荆下馬自稱正季
貞身從淮北來江滸身是胡君好儔侶胡君身後身任
之應爲養親兼嫁女此事人人歎奇絕媲美者誰趙天
羽此詩有益風教

嚴藕漁病瘡口占云嗒然隱几動兼旬直是難分病與
貧唯有玉蘭堂下客死生料理白頭人賸魄殘形費錯
磨火雲雪浪兩嵯峨莫言此際暄涼甚飽歷人情不啻
過有覩新妝竟莫逃漫矜君子笑兒曹但令便作終焉

計白首同歸舊姓陶

靖節以瘞死

貧愧文園典鷓鴣故人藥

裏又相將秋心支枕添衰颯轉憶平生惠好長坐移晷
刻正無聊灑背青霜漸覺飄若語世情爭比似信如八
月廣陵潮紅蕖香褪病初生青桂花開欲送行扶起賸
看端正月照人猶向故園明小詩極見風趣余辛亥中
秋後病瘧者五旬幾致不起惜未能從五柳先生後也
藕漁中允湖上竹枝詞白頭漁父見承平吹笛孤山舫
艇輕見說天家錢又趙惱人湖水不分明有風人之致
歐陽礪東金陵二首云殘劫誰能扇死灰笙歌猶自聞
如雷漫誇龍虎鍾王氣不記前朝白雁來王謝風流事

已非莫將門巷問烏衣生憎無數春深燕猶趁樓臺高
處飛不啻讀辛幼安吳彥高詞

藕漁病窗口號云一編血碧爲知稀枉落廷評有是非
我憶田橫門下士輓歌悽斷誓同歸讀嵇留山遺稿作
也留山同范忠貞殉節後康熙十九年經原任撫臣楊
熙疏請贈銜部臣以書生無贈銜之例行文閩撫酌給
銀兩直至四十九年自牧尙書以留山等毫無官守視
死如歸查馬雄鎮殉難有幕友孫成陳文煥等冒險來
歸俱蒙議敘生者尙爾蒙恩死者更望加卹祈特恩予
以一命之榮得邀陪祀之典部議援游擊魏萬侯之子

生員魏棟殉難酌贈助教之例如所請行當時部臣持法之嚴與 聖代褒忠之渥固兩盡矣

龐雪崖和陶詩如黃金本無情見者自生喜喜生怨已伏爭奪起多事趙張不令終廣受全晚節禍福有根源得失非巧拙語皆見道自序謂江文通擬其體蘇長公比其題論者謂文通少言外含蓄之味長公有依樣葫蘆之譏揆余之詩不過由已之志言已之言借陶之韻成己之章亦篤論也

夏桂洲奉使琉球卻金不受國人爲之建亭喬東湖汪悔齋奉使詩到時尋故事聞有卻金亭東湖爲廣陵隱

君子好友重氣節孔東塘稱其詩多深情遠識句如當
壚有酒堪謀醉橫帶何人肯息機年侵始悔儒冠誤事
往空慙劍術疏皆見襟抱卓子任選遺民詩東湖贈以
詩云劫火燒殘圖籍空藏山沈井慨何窮誰搜放失傳
遺老獨表幽潛續變風浩氣長留冰雪後高吟多在草
茅中所思賴爾重相見把卷依然笑語同所與酬唱多
棲逸之士也

文待詔徵仲西苑詩後紀云嘉靖乙酉春同官陳侍講
魯南馬修撰仲房王編修繩武偕予爲西苑之游先是
魯南教內書堂識守苑官王滿寶導予四人行因得盡

歷諸勝旣歸各賦詩紀之馬侍郎仲房紀游西園詩內
有芭蕉園者殿名崇智舊在承光殿南而太液池瓊華
島皆列前後云順治中於此改建佛宮顏曰萬善延名
僧講法其中敕內臣十二人薙髮受具列居左右 世
廟賓天 仁皇未嘗輒幸外人或與僧有舊得援入瞻
仰海鹽徐滄浮以選貢觀光乙巳上元前二日獲進西
內徧謁勝處其宿始上人房詩誤作椒園後二十年復
成懷蕉園舊游二詩云蕉園池島舊西清二十年前向
此行身到尙疑來夢寐追思真覺異平生干章檜識前
朝物萬善宮懸聖代名讀罷昔賢西苑什滄江懷舊不

勝情團殿凌風翠靄凝曲闌曾記晚來憑銀臺坐水瓊
華月玉鏡行天太液冰霄漢昔年身偶到江湖此日夢
誰能瀛洲詞客還相詫慙愧書生一度登蓋以志一時
之幸也

陶廷珍謂姚熙之少保當甲寅閩變破家募戰士守仙
霞迨臺灣之亂衝鋒陷陣雖施琅功然運籌決勝應時
輸軍餉重犒收士心俾琅多寡緩急靡不如意者皆少
保力也劉國軒敗澎湖凱旋琅於海道奏捷七日而抵
京師少保由內地馳報遲琅二日琅已先封靖海侯矣
其論至允袁存齋稱其身長七尺白晳兩目精光四射

手勒奔馬用弓至二十石麾下所養奇材劍客皆能得
其死力臨陳時應變如神而性慈不妄殺戮視師云一
道紅塵馬上來共傳節度視師回池亭臺榭都生色不
止深閨笑口開可想見其瞻矚非常

高涓師提學璜幼沈毅讀書工文以庚戌庶常散館改
工部壬戌任江西提學道以先正之文砥礪諸生捐俸
修學士民立碑記其善政馬鬼驛句云莫謂紅顏真誤
國會將一死報君王熟題而能生新者也

海鹽馬世榮煥如居俯浦去城市不數十里而近道狹
多港汊舟容百斛卽泥曳其背兩岸柳枝礙篷席有臥

木成橋久之朽蠹欹側以竹相支架風過輒嫋嫋搖動
人無敢行其上縛稻草置屋上禦風雨好與僧一靈黃
山畸人及蘭社庵主辦香老人相還往文孫維翰輯刻
其詩二卷贈董啟云載月坐天上背花眠酒邊平生無
可說只是撫龍泉偶興云自笑生涯一蠶齏偶尋菜圃
更桑畦東風乍有關心處側耳斜陽播穀啼頗有自得
之趣辛酉中秋數官客寓湖上擬作西湖夜月詩限璧
白二韻煥如因步月微聞之卽伺隙大書壁閒而去咸
疑爲仙讀書不務多持一冊循環往復歷數百周自謂
於書如噉飯固無異味亦每日再三不厭誠解人也

康熙四年青海蒙古乞大草灘爲牧地副將王進寶持
不可謂大草灘甘涼扼要若與之藩籬撤矣乃白軍門
靖逆侯張勇遂乘八擱車突往止之蒙古乃退進寶人
面黑軍中號爲喀喇巴圖魯和太庵甘州歌有蜚熊更
突八擱輶之句蜚熊勇字也

德清詩人蔡遠士居嘉興梅里性疏嬾自號嬾人同學
朱求俟太學願爲以狂自喜時稱狂朱嬾蔡時古南牧
雲和尚號嬾齋周嬾予爲圍棋國手有三嬾之目遠士
寄懷求俟詩云撫塵曾憶童年戲轉眼今成老弟兄我
嬾君狂俱是病莫矜長處誤生平雜詠有平生不自愛

辛苦作詩人之句叔夜高邁以孌藏眞者也

馬寒中爲推官麟翔子其作先公年譜成云筆成年譜
倍心酸留與孫曾仔細看無數仁慈有數壽廿年書卷
半年官自署惟應撫字勞未妨庭訊及秋豪竹西歌吹
今零落猶有衣冠像叔敖家有道古樓不減雲林清閼
閨人查惜字淑英爲查西母女詩亦清雅皆山堂集與
吟香閣集並流播於世同時上虞徐仲山婦嗣音女昭
華皆閨中之秀己未仲山應鴻博放歸某公贈聯云北
闕上書爭識西京才子東軒賜食歸貽南國佳人亦佳
話也嗣音爲前明商等軒家宰周祚女與女兄景蘭俱

能詩雨集承雛堂云當年繡戶集羣仙一旦分飛罷管
絃不道寒飈吹雨過新亭池畔話當年有滄桑之感昭
華有徐都講集景蘭爲祁忠敏室忠敏懷沙夫人教其
諸子理孫班孫及子婦楚纒趙璧女卞客湘君咸工題
詠極一時之盛焉餘姚姜廷梧桐音爲明大司農一洪
仲子鼎革後闔戶而居娶忠敏女弢英亦賢而有文時
相唱和桐音旣歿弢英三年後仍縞素子芑貽等請易
服不許曰俟若輩有成名者則易之芑貽登康熙癸酉
賢書復請乃易之毛大可爲作祁夫人易服記

蕭山傅宗德孚沈功宗孚先讀書江園稱江園二子毛

大可題其詩文曰兩龍躍雲津雙珠生浦源孚先送德
孚之昌化云縱使有心千里共也憐知己片時疏

鄞縣張蓉嶼大令瑤芝詩筆雄健句如人因無事老詩
竟近情難無愁不種忘憂草送老宜栽晚節花交從澹
處猶防薄詩到真時定可傳皆本色語

秦留仙著有毛詩日箋宋商邱爲之序其召試詠鶴高
鳴常向月善舞不迎人之句爲 孝陵所獎異從戎荆

楚有軍中口號二十首可見爾時規制詩云曉色旗邊
戰馬肥隔江消息近來稀不鳴鼓角轅門啟擎出紅綾
夜探歸諸王授鉞稱兵主總制尙書立馬前諭帖飛傳

從內院印文柳葉暗龍箋將軍號令本嚴明父老焚香
夾路迎吹角一聲江上晚干邨樵采盡歸營大砲西洋
鑄造新瑩如綠玉重于鈞內廷賜出非凡器吉日臨江
祭火神椎牛饗士古人爲妙舞酣歌亦暫時新得佳人
知識字帳前昨夜進唐詩蒙古新軍赴戰場腰纏紅錦
鬪身強閒騎細馬當街走笑奪黃柑帶子嘗兵家利鈍
事由天密咒防身箇箇傳寶篆須求雷擊木二眉山裏
問神仙沿江帳殿亦崔嵬甲仗軍門候曉開白馬朱纓
橫意氣雀翎雙眼大人來鐵騎從來風雨馳西陵道路
苦崎危深壕掘作梅花樣鹿角中間布蒺藜渡江戰具

久安排新調沙船泊水涯軍令未教輕易入西風浪打
虎頭牌大漢從軍一丈身不堪騎馬走黃塵忍饑日食
官倉米過市兒童看殺人隘口譏防出汛船巡軍醉酒
故高眠官鹽論載公然渡市上爭看當十錢橘柚江湘
未足多荊州菱藕滿官河軍中只重京師味蘋果蒲萄
馬上馱北使南馳五日餘八旗親戚附家書繡囊密寄
閨中字襯甲收藏莫負渠中軍燈火夜深明白月橫空
坐論兵策馬試從高處望帳房如雪不聞聲米豆分營
費馬蹏有司支放苦難稽朝來酌酒爭相賀索得清書
檔子齊祭風臺上蕭蕭雨搗鼓旗邊殷殷雷波撼岳陽

聽不得君山一點送青來
都城常賽漢將軍
簫鼓迎神自昔聞
今日椒漿陳水上
雲中遮莫下
湘君白頭從事
愧虛名長畫
惟將卷帙橫
幕下
健兒多竊笑
兵閒何用一書生

淄川唐豹岳檢討已丑登第時甫弱冠以劾言官陰潤
罷歸高念東贈詩有志能自見復何憾士所當爲尙自
多之句可謂古誼家居五十餘年詩以新穎自得爲宗
過故人舊圃云十年澗壑共栖遲往事衰涼有夢知月
照清尊行命酒秋分霜葉坐題辭鳴泉初引成渠日竹
樹新栽見長時一自山邱零落後林閒無復水平池漁

洋謂詩格逼近劉白其獨酌放歌有齊東倒篋備民糧
之句盧雅兩引楊升庵之言曰高歡立法盜私家十備
五盜官家十備三後周詔侵盜倉廩雖經放免徵備如
法備音裴續補也今作賠義同檢討詩從古也至社燕
詩傳舍之傳作平讀則未知何據

鳳陽許隱君汝一精易數種樹爲業不入城府齊處士
遠芳家壽春之罨莊淮水經其南環居種柳自號萬柳
主人喜讀書尤工醫李武曾漫興云許叟披裘背郭邨
避人讀易小蓬門下簾土銼疏煙裏七十看花眼未昏
一卷岐黃坐擁氈罨莊只課市魚錢藥欄駐馬渾閒事

肯放先生穩晝眠武曾客鳳陽久其過黃媪小園題竹
四絕句有云百尺女貞高竹外歸禽未許作雙棲亦黃
四孃之流亞也

延陵女史吳懷鳳栖梧閣詩一册自署桐山司馬之裔
與方邵村同爲何太傅文端公外孫嘗以詩畫就正邵
村多危苦之詞其贈仲姊詩序有云昔春秋傳曰諸侯
有相滅亡者桓公不救則桓公恥之今公等旣不能濟
之孤弱援之水火徒以憐才虛念供羣口描畫云云可
以識所遭矣

海陽李望石侍郎贊元按楚收大獬段世昌事鈕玉樵

紀之甚詳高座寺詩云地僻車馬稀日對娑羅樹秋風
一夜來落葉紛無數煮茗作山供客來汲泉去但知泉
水甘不辨泉源處風味極爲澄澹

謝方山比部名在康熙十子中濟南云成宏以後論風
雅許李邊劉派最眞可惜襲生吟獨苦不逢健筆鬪清
新萬厯詞人十輩餘楊邢之外各遺書麤才遁句崢嶸
甚古調凜風似不如念東句比樂天真子底才名李杜
倫更有詞場唐夢賚時從逸處見嶙峋低頭蠶尾思懷
古放眼山薑喜鬪新耳食紛紛問流派不知身是濟南
人漁洋謂其有關掌故句如與喜臣云鳥飛猶識倦樹

老白無花阮亭先生再留西堂云鑪香生午寂亭樹吐
新妍所謂不學樂天而有其自得之趣者也

二曹兄弟齊名澹餘撫黔癸丑上巳詩有晴絲亂比殘
宵夢倦鳥驚同久住人之句旣而陷賊中庚申遇害於
昆明之雙塔寺入逆臣傳乾隆中法梧門在館中勘校
諸功臣傳與邵二雲書云功臣傳有從逆之臣誤行載
入者如貴州巡撫曹申吉叛降吳三桂見 實錄及平
定三藩方略今功臣傳有曹申吉傳言其殉難而甘文
焜傳仍言申吉從逆兩傳自相牴牾應改正云云蓋前
後纂修人非一手訛舛所時有要當以實錄方略爲準

李秋錦寄實庵詩淚溼不緣懷古意夢來先繞對牀人
邊花落後應逢雁妖鳥啼時祇暫春兼憶令弟中丞公
而作也實庵詩如秋夜偶成云人聲低市鼓雁影亂明
河冬日東萊道中感懷云愁似春雲多鬢鬣老如秋葉
易飄零看雲憶弟一往情深示霖用蘇韻云狂飈掠歲
已崢嶸相見惟聞飲泣聲千里踏來黃葉路三年愧爾
白雲情愁中作客籌鹽米夢裏逢人亂死生濁酒一杯
鄉味在任他風雪暗長檠霖字掌霖澹餘子也

山陽阮氏自明初由江右清江以武功隸大河衛世居
城西鶴緱徵君晉嘗與閻百詩同應鴻博之徵於老屋

外增闢園林南莊曰藍邱草堂東莊曰夏雲草堂春秋
往來課耕觀穫歲必數至入之歌詠仁廟初年文社
甚盛曲廊修竹徧題名流之作歲暮段而藏之秦雲九
徐健庵果亭邱南齋閣百詩彭方洲皆有題名白吟亭
詩稿甚富查初白梓行本十之一二耳子裴園檢討課
士勺湖著治經日程教學遺規四禮翼注及學規孫唐
山司寇於東南兩莊各詠小詩其憶勺湖草堂歌寄同
硯諸知已云朝宗門西荻花白湖光一曲環城碧虹橋
宛轉浸玻璃鶴觀櫺櫓圍水石亦可想見其勝概焉唐
山從祖越軒給諫應商以劾吏部一疏著直聲著有春

秋彙傳析義同邑周白民時文爲望溪樸山二方所推
尹元孚稱其進止不愧儒者以選貢終周蓼浦龍官雍
正癸卯通籍丁未入翰林有自訂四書文稿邱蘭成著
有天官考正呂澂雲才藻震爆一時歌行追唐十四家
均見唐山歲朝懷人詩惜諸家詩俱未見

太學有進士題名 章皇帝丙戌開科碑亭具在厥後
闕焉吳鱗潭以壬申擢祭酒言於朝凡進士見官京師
或子若孫在朝列者捐金代石十有八科碑版林立迺
按明進士自永樂迄崇禎凡七十有八科惟五十餘碑
存掘諸土中厯科盡出而永樂首科復於啟聖祠墜得

之一日獲元題名三一爲正泰國子貢試名記蒙古色
目漢人各有正副榜一爲至正十一年進士題名記蒙
古色目列三甲狀元爲朵列圖漢人南人列三甲狀元
爲文允中知榜眼探花元代所無一爲至正丙午國子
中選題名記蒙古賜正六品色目從六品漢人正七品
皆有正副榜鱗潭爲文紀之鱗潭卒金會公哭以詩其
卒章及其事復著之於吳祭酒傳中按順治壬辰科分
滿漢爲二榜蒙古入滿洲榜漢軍入漢人榜初選漢軍
四人爲庶吉士

遲煌范承謨
思孔陳永命

丁滿榜賜進士及第出身

並與漢榜同一甲授職者麻勒吉折庫納巴海選庶吉

士者賽沖阿等六人乙未科亦分滿洲蒙古爲一榜如
壬辰之例至館選時則停選漢軍庶吉士而滿洲蒙古
漢人同一諭旨至康熙庚戌則滿漢同榜滿洲館選者
爲德格勒牛鈕博極而漢軍選庶吉士者高璜王維珍
李玠李夢庚沈獨立五人亦後來所未有也
成我存給諫性號率庵和州人嘗從鄉人戴重問學以
明經授中書成己丑進士巡按福建論殲寇機宜在工
科陳風俗吏治章疏數十上皆切實有當利病
聖祖
知其喜爲文詞俾與翰詹諸臣試文字詩如交人但交
老老翁益人厚士如鹽在水食之味乃生皆見道之言

德州蕭韓坡侍讀惟豫魏敏果以陸清獻同薦諸朝嘗
偕周菊人掌垣典試江右李尙書振裕出其門以母老
陳請歸養所居曰雲莊惠研溪寄韓坡詩賈誼縱窮猶
適楚樂生雖老尙思燕怪君神采今方壯已脫朝衫十
八年漫說瞻雲憶故鄉板輿席帽正相妨可憐貴賤皆
人子搢笏看君候北堂今朝屏當住深村短榻蕭然臥
竹根花外幾人來問字黃鸝三請不開門翠管銀罌知
不用小鷓歌扇亦無聞只應一事難忘卻南浦懷人望
白雲

計甫草丁酉舉京兆後四年以奏銷案黜籍家貧母老

饗殮於客程周量贈詩有身受才名誤文從患難真之
句湯陰道中云柳廊一望碧煙齊策馬郊原古道低不
見長條解搖曳故園南望轉淒迷荒祠寂寞對悲風古
碣重題嵇侍中最恨彈琴東市日錯將六尺寄山公太
行山色青無際林慮縈迴似碧城莫怪岩樓司馬客銅
駝荒草不關情鵬舉先生儒將風譚經奉母最雍容挽
強每念師恩厚杯酒常澆鵲血弓其座主爲黃岡曹木
欣學士感恩念舊每見於詩贈楚黃劉千行云悠悠深
懼負師門楚客相逢每斷魂與問黃岡身後事春星當
戶已黃昏亦追念學士而作也寄內句云膽小須教嬌

女伴啼痕莫遣老親知語亦入情